

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Taon XXXVI Blg. 19
Oktubre 7, 2005
www.philippinerevolution.org

Editoryal

Biguin ang umiigting na pasismo ng rehimeng Arroyo

Papatinding panunupil at pasistang karahasan ang isinasagawa ng rehimeng Arroyo sa imbing layuning pigilin at patahimikin ang lumalawak na panawagan ng sambayanang Pilipino para wakasan ang kinamumuhang rehimen. Walang kaabug-abog nitong ipinagbabawal ang mga demonstrasyon sa lansangan sa ngalan ng *"calibrated preemptive response"*. Tulad ng isang diktador, binubusalan ni Arroyo ang kanyang mga upisyal sa pamamagitan ng Executive Order 464. Nagkukumahog itong kumpletuhin ang ha-

yagang pasistang paghahari kaya minamadali ngayon ang pagpapasa ng Anti-Terrorism Bill na naglalaman ng mga probisyong katumbas ng batas militar.

Muling binubuhay ni Arroyo ang pasistang hali-maw na namayagpag sa panahon ng diktadurang Marcos sa layong duruin at takutin ang mamamayan. Ni-yuyurakan niya ang mga karapatang-tao, mga kalayaang sibil at mga demokratikong proseso. Ipinangangalandakan niya ang pagpapairal ng batas para lamang lapastanganin ito. Ginagawa niyang lahat ito sa pag-aakalang kaya niyang patahimikin ang mamamayan at pigilan ang kanilang pag-aalsa.

Kumikilos si Arroyo na parang isang diktador. Tulad ni Marcos, ipinailalim ni Arroyo sa kanyang kapangyarihan ang mayorya ng mga kongresista sa pamamagitan ng pagbili ng kanilang katapatan. Nagamit na niyang kasangkapan ang mga ito para patayin ang proseso ng *impeachment* at pigilin ang imbestigasyon sa pandaraya sa nagdaang eleksyon. Ginagamit niya sila ngayon upang madaliin ang pagpapatibay ng Anti-Terrorism Bill. Isa na lamang *"rubber stamp"* ang kongreso na tagaaprubang



Mga tampok sa isyung ito...

Isang M60, nasamsam ng BHB sa Isabela
PAHINA 4

Mapanupil na mga patakaran ni Arroyo
PAHINA 6

Pasistang karahasan ni Palparan sa Central Luzon
PAHINA 6

anumang panukalang batas na nais itulak ni Arroyo.

Katulad ng desperadong diktador, nais din ni Arroyong hawakan sa leeg ang lahat ng upisyal ng gubyrno at militar. Itinuturing silang mga de-susing robot na kikilos lamang alinsunod sa kanyang kautusan. Ang sinumang sumuway ay binabantaang patatalsikin sa trabaho at parurusahan.

Ang tumitinding mga pasistang hakbangin ni Gloria Arroyo ay palatandaan kung gaano na kadesperado at kung gaano na kabuway ang kanyang hawak sa kapangyarihan. Sa harap ng napakatinding krisis na bumabayo sa naghaharing sistema, hindi na makapaghari si Arroyo sa dating kaparaanan. Upang makapagtagal pa sa poder, kailangan niyang gumamit ng lantarang pasistang pandarahas para pilitin ang mamamayang pumailalim sa kanyang awtoridad.

Hinding-hindi ito mapahihintulutan ng mamamayan. Taglay nila ang matingkad na aral mula sa panahon ng diktadurang Marcos na ang sinumang tirano at palalo ay maibabagsak ng mamamayang mahigpit na nagkakaisa at militanteng lumalaban. Hindi habambu-



Ang tumitinding mga pasistang hakbangin ni Gloria Arroyo ay palatandaan kung gaano na kadesperado at kung gaano na kabuway ang kanyang hawak sa kapangyarihan.

hay nakapaghari si Marcos sa kabilang ng mas malakas niyang kontrol sa militar. Lalong hindi tatagal si Arroyo sa harap ng tumitinding demoralisasyon, pagkakawatak-watak ng AFP at PNP at pagtutol sa kanya ng makabuluhang bilang ng mga upisyal at tauhan ng militar at pulisya.

Katulad ng ipinakikita sa nagdaang mga araw, pursigido at paulit-ulit na hahamunin ng mamamayan ang mga pasistang panggigipit sa kanilang kalayaang maglunsad ng mga kilos protesta. Sa pagtindi ng pasismo ng rehimeng Arroyo, lalong namumuo ang malawak na galit ng mamamayan. Balewala ang pag-aastang diktador ni Arroyo oras na sumabog na tulad ng bulkan ang mabilis na natitipong poot ng bayan sa kanyang pasismo at pagpapahirap sa mamamayan.

Higit kailanman sa nakaraan,

ngayon din ang panahong dapat paigtingin pa ng Bagong Hukbong Bayan (BHB) ang mga taktikal na opensiba. Ipinagbubunyi ng sam-bayanang Pilipino ang matatagumpay na opensiba ng BHB sa mga nagdaang linggo. Inspirado silang lalong pag-ibayuhin ang kanilang mga pakikibaka.

Iniinda ng rehimeng Arroyo ang marami at lalo pang daraming maliit at malalaking sugat nito dulot ng mga taktikal na opensiba ng BHB. Ang mga ito ay nagdudulot ng kaguluhan, demoralisasyon at pagkakahati-hati sa loob ng AFP at PNP. Ang mga iyon ay angkop na parusa sa isang labis na malupit na rehimen. Ang pinakapusakal na mga pasistang kriminal ay naparusahan at nakakamit ng mamamayan ang rebolusyonaryong katarungan. Hinihila rin ng BHB ang mga pasistang pwersa patungo sa mga larangan ng labanan sa kanayunan upang mas maluwag at malayang hayagang makapagprotesta ang mamamayan sa mga sentrong lungsod at kabayanan.

Katulad ng batas militar ni Marcos, ang kasalukuyang mga pasistang hakbangin ng rehimeng Arroyo ay makapagbubunsod ng lalo pang paglawak at paglakas ng apoy ng rebolusyonaryong armadong pakikibaka. Inilalantad nito sa mamamayang Pilipino ang pasistang kalikasan na nasa ubod ng reaksyonaryong estado. Itinuturo nito sa api at pinagsasamantalang mga uri, na wala silang ibang masusulingan kundi ang humawak ng sandata at isulong ang armadong rebolusyon.

AB



Taon XXXVI Blg. 19 Oktubre 7, 2005

Ang *Ang Bayan* ay inilalabas sa wikang Pilipino, Bisaya, Iloko, Hiligaynon, Waray at Ingles.

Maaari itong i-download mula sa Philippine Revolution Web Central na matatagpuan sa:

www.philippinerevolution.org

Tumatanggap ang *Ang Bayan* ng mga kontribusyon sa anyo ng mga artikulo at balita. Hinihikayat din ang mga mambabasa na magpaabot ng mga puna at rekomendasyon sa ikau-unlad ng ating pahayagan. Maaabot kami sa pamamagitan ng email sa: angbayan@yahoo.com

Nilalaman

Editorial

Biguin ang umiigting na pasismo ng rehimeng Arroyo 1

Matatagumpay na TO

Mga armadong aksyon sa Mindanao 3
Kontra-reb, pinarusahan ng BHB 4
Isang M60 nasamsam sa Isabela 4
Mga aksyong militar sa Bikol 5

Panunupil ng rehimeng Arroyo 6

Ligalig na mga sundalo 9

Kontrol ng US sa 'chacha' 10

Arroyo, nagkukunwaring maka-magsasaka 12

Pananalanta ng pasistang estado

Pasismo ni Palparan sa Central Luzon 13
Libing ng pinaslang na lider-obraero 13
5 lider-magsasaka, inaresto 14
sa Negros Occidental 14

Balita 14

Ang *Ang Bayan* ay inilalathala dalawang beses bawat buwan ng Komite Sentral ng Partido Komunista ng Pilipinas



Mga armadong aksyon ng BHB sa Mindanao

Labingwalong sundalo, pulis, elemento ng CAFGU at abusadong mga gwardya ang napatay sa 24 na mga taktikal na opensiba (TO) ng BHB mula Setyembre 20-Oktubre 3 sa Mindanao.

Di rin bababa sa 13 tropa ng kaaway ang nasugatan, ayon sa pinakahuling ulat ni Jorge "Ka Oris" Madlos, tagapagsalita ng National Democratic Front-Mindanao. Isang M14, isang M16 at apat na *shotgun* ang nasamsam. Ani Ka Oris, suminsin sa panahong nabanggit ang mga armadong aksyon ng BHB sa isla mula isa hanggang dalawa bawat lingo tungong isa hanggang dalawa araw-araw.

Ang mga inilunsad na TO ay kinabibilangan ng 18 operasyong isnayping at harasment laban sa mga detatsment ng mga batalyon ng Philippine Army at mga hedkwarters, *command post* at detatsment ng kumpanya; dalawang aksyong militar para mang-agaw ng armas; isang espesyal na operasyon na sumira sa dalawang tore para sa *signal intelligence* at komunikasyon ng 4th ID; isang operasyong isparo laban sa isang pusakal na operatibang paniktik; isang operasyong pamamarusa laban sa isang importer; at pang-aagaw ng armas ng isang myembro ng milisyang bayan mula sa isang detatsment ng Philippine Army-CAFGU.

Pangunahing naging target ang mga armadong pwersa ng reaksyunaryong gubyrno na kilala sa paglabag sa karapatang-tao, kinamumuhian ng masa at sangkot sa mga gawaing kriminal laban sa mamamayan at rebolusyonaryong kilusan. Kaya 20 sa 24 na armadong aksyon ay laban sa Philippine Army at CAFGU at dadalawa lamang ang laban sa mga pwersa ng PNP. Isa ring *security unit* na sangkot sa

pang-aagaw ng lupa ang tinarget ng BHB.

Sumusunod ang detalye ng ilan sa mga armadong aksyong ito:

Tinambangan ng BHB ang mga elemento ng PNP na nakasakay sa labas ng isang *armored personnel carrier* (APC) sa Mat-i, Surigao City noong Setyembre 30. Apat na pulis ang napatay, kabilang ang isang nasagasaan ng APC nang tumalon siya para umiwas sa mga putok. Apat pang pulis ang nasugatan sa ambus.

Tatlong kaaway naman ang napatay nang salakayin ng BHB ang detatsment ng AFP-CAFGU sa San Pedro, Lianga, Surigao del Sur noong Septembre 24. Ligat na nakatras ang mga Pulang mandirigma matapos ang 15-minutong labanan.


Sa parehong araw, hinaras ng mga Pulang gerilya ang isang kampo ng 30th IB sa Barangay Mahaba, Cabadbaran, Agusan del Norte, kung saan dalawang sundalo ang napatay.

Tinambangan naman ng BHB sa North Central Mindanao Region ang mga abusadong gwardya ng Ozamiz Agricultural Development Inc. (OADI) Farms na lulan ng isang sasakyan noong hapon ng Setyembre 20 sa San Jose, Quezon, Bukidnon. Pusakal na mangangamkam ng lupa ang may-ari ng OADI Farms na si Pablo Lobregat (kamag-

anak ng mga Lobregat na isa sa pinakamalalaking panginoong maylupa sa Zamboanga peninsula). Apat na gwardya ang napatay at nakumpiska mula sa kanila ang isang rip-leng M16 at apat na *shotgun*. Ang opensibang ito ay tugon ng BHB sa matagal nang kahilingan ng mga grupong Lumad sa lugar na inagawan ng lupa ng OADI.

Samantala, nadagdagan ng isang M14 ang BHB nang agawin ito ng isang myembro ng milisyang bayan mula sa detatsment ng AFP sa Barangay Mahayahay, San Luis, Agusan Sur noong Setyembre 20.

Sinira naman ng apat-kataong tim ng BHB sa ilalim ng Eking Balacuit Command ang malalaking *antenna disc* ng tore ng komunikasyon ng 4th ID sa Ginalaban, Salay, Misamis Oriental noong Setyembre 25. Napakahalaga sa *intelligence* at komunikasyon ng AFP ang naturang mga *communication tower*. Humigit-kumulang 300 metro lamang ang layo ng mga tore sa detatsment ng 9th IB na siyang nagguwardya rito. Gabi nang ito'y komanduhin at mag-uumaga na nang paputukan ng M14 at Garand. Hindi na gumanti ng putok ang kaaway.





Pusakal na kontra-rebolusyonaryo, pinarusahan ng BHB

Pinarusahan ng Ka Paking Guimbaolibot Red Partisan Brigade nitong Setyembre 30 ang isa sa pinakamatitinding kaaway ng masa at mga rebolusyonaryong pwersa sa Compostela Valley.

Ang pusakal na si Sgt. Martial "Jun" Colot ng Intelligence and Security Unit (ISU) ng Philippine Army sa Region XI ay napatunayan ng hukumang bayan na gumawa ng mabibigat na krimen sa mamamayan at hinatulan ng parusang kamatayan. Isinakatuparan ang parusa sa Trento, Agusan del Sur. Nasamsam sa kanya ang isang .45.

Pinarusahan si Colot dahil sa mahabang listahan ng mga utang na dugo at krimen laban sa masa at rebolusyonaryong kilusan. Bilang nangungunang operatiba ng ISU, aktibo niyang pinamunuan ang isang kriminal na pangkat ng mga ahenteng paniktik sa pananalbeyds, panonortyur, pangingidnap, pangigikil at panghahas sa mga rebolusyonaryong organisasyong masa.

Malaki ang kanyang papel sa brutal na pagmasaker sa Mawab 4 noong Agosto 1999. Ang tinaguri-

ang Mawab 4 ay kinabilangan nina Godofredo "Ka Paking" Guimbaolibot na kadre ng Partido, Rolando Jubahib na Pulang mandirigma at dalawang sibilyan.

Malaki rin ang kinalaman ni Colot sa pagdukot, pagtortyur at pagpatay sa Maco 4— mga kabataang aktibistang sina Marjorie Reynoso, Lito Doydoy, Ramon Ragase at Jonathan Venaro—noong Setyembre 19, 2003.

Responsable rin siya sa pagpatay noong 2001 kay Tatay Loloy, isang lider magsasaka sa Sityo Lower Buay, Barangay Baylo sa bayan ng Mongkayo. Noong taong iyon ay nagdirihe si Colot ng mga pananalakay laban sa mga yunit gerilya ng BHB sa mga barangay ng Pasian at Baylo sa naturang bayan.

Sa Southern Mindanao Region, panlima na ngayong taon si Sergeant Colot sa mga operatiba ng ISU at Intelligence Service of the AFP na hinatulang nagkasala ng hukumang bayan at pinarusahan ng BHB. AB

Isang M60 nasamsam, 8 sundalo napatay sa mga opensiba ng BHB sa Isabela

Walong sundalo ang napatay at di mabilang ang nasugatan sa dalawang pananalakay ng Bagong Hukbong Bayan sa mga nag-operasyong tropa ng gubyrno noong huling linggo ng Setyembre sa Echague, Isabela.

Ayon sa pinakahuling mga ulat ng Benito Tesorio Command ng BHB sa Southern Isabela, pitong sundalo ang kumpirmadong napatay at di mabilang


ang nasugatan nang salakayin ng mga gerilya ng BHB ang isang platoon ng mga sundalo ng 45th IB na nagpapahinga noong Setyembre 24 sa Barangay San Carlos. Kabilang sa mga napatay ang punong upisyal ng kaaway na si 1Lt. Jerry Fernandez. Nakasamsam din ang mga Pulang mandirigma ng isang M60 masinggan at isang M14.

Isa ring sundalo, si Cpl. Norly Osorio ang napatay sa mas nanang pananalakay ng BHB noong

Setyembre 22 sa Barangay Madadamian. Si Osorio ay bahagi ng dalawang platoon ng 54th IB na nag-operasyon sa lugar. Nakasamsam dito ang BHB ng isang ripleng M16 at nakaatras nang walang kahit isang kaswalti.

Ang dalawang taktikal na opensibang ito ay inilunsad bilang tugon sa panawagan ng sentral na pamunuan ng Partido Komunista na sagpangin ang inisyatiba at paigtingin ang mga taktikal na opensiba sa gitna ng tumitinding krisis ng rehimeng US-Arroyo.

Bahagi rin ito ng kontra-opensiba ng BHB laban sa patuloy at tumitinding mga operasyon ng AFP na bumibiktima sa mga sibilyan sa Southern Isabela. AB






Mga aksyong militar ng BHB sa Bikol

Inilunsad sa Bikol ang isang linggong koordinadong mga aksyong militar mula Setyembre 28 hanggang Oktubre 1. Tatumpu't walong matatagumpay na aksyong militar ang nailunsad sa linggong ito. Labinlimang sundalo ang napatay at 15 rin ang nasugatan sa naturang mga aksyon. Walang kaswalti sa panig ng Bagong Hukbong Bayan (BHB).

Ayon sa Romulo Jallores Command, naipagtagumpay ang koordinadong kampanyang militar dahil sa malawak na suporta ng mamamayang Bikolano sa BHB. Labis na nabigla ang mga pwersa ng AFP at PNP sa mga sorpresang atake ng mga Pulang mandirigma. Sa kabilang banda, pilit na itinatago ng 9th Infantry "Orgullo" Division ng Philippine Army ang mga pagkatalo nito sa kamay ng BHB sa Bikol. Ang tagapagsalita ng 9th ID na si Col. Serafin Raymundo ang pangunahing nagsasaboy ng mga kasinungalingan hinggil sa totoong kinalabasan ng mga labanan sa pagitan ng BHB at AFP.

Ani Colonel Raymundo, wala raw natatamong anumang kaswalti ang AFP samantalang maraming namamatay at nasusugatan sa hanay ng BHB. Kabaligtaran nito ang katotohanan.

Taliwas sa pagyayabang ng AFP, dalawa ang nasugatan sa hanay ng 42nd IB nang tangkain nilang lusubin ang isang yunit ng BHB sa Bicalen, Presentacion, Camarines Sur noong Hulyo 12. Nakilala ang mga sugatan na sina Corporal Salaun at Corporal Pascual ng Bravo Company ng 42nd IB. Matapos ang dalawang araw, isa pang sundalo ang nasugatan nang isnaypin ng BHB ang nagsidatingang reimporsment. Ang nag-uulol sa galit at na-



tarantang mga militar ay walang habas na nagpaputok sa iba't ibang direksyon. Wala ni isang napinsala sa mga Pulang mandirigma.

Dahil sa matinding kahihyang kanilang tinamo, nagsikap bumawi ang mga militar. Ipinahukay nila ang mga puntod sa sementeryo ng katabing baryo ng Maligaya, Caramoan, Camarines Sur at sinabing ang lahat daw ng mga bangkay na walang kabaong ay mga myembro ng BHB. Ang mga ito ang ipinagmayabang nilang naging kaswalti umano sa hanay ng mga Pulang mandirigma.

Nito namang Agosto, apat na sundalo ang napatay ng mga Pulang mandirigma nang tangkain ng 7th Scout Ranger Company na kububin ang isang iskward ng BHB sa Barangay Agpay, Guinobatan, Albay.


Nitong Agosto pa rin, habang nag-ooperasyon ang mga tropa ng "C" Company ng 2nd IB sa Barangay Pawa, Matnog, Sorsogon, ininayp ng isang tim ng BHB ang walang kamalay-malay na mga kaway. Sa isang putok, napatay ang punong upisyal ng kumpanya. Nasugatan naman ang isa pang sun-

dalo.

Pilit namang ibinibintang sa BHB ang mga krimen ng mga elemento ng 9th ID. Isang insidente ang pagsalbeyds nila kay Pfc Gilbert Halcon, isa nilang tauhan, sa Gubat, Sorsogon nitong Agosto. Si Halcon ay *triggerman* ng militar sa pamamaslang sa mga sibilyang pinaghihinalaang sumusuporta sa rebolusyonaryong kilusan. Sangkot din siya sa serye ng mga pangholdap sa nasabing probinsya. Dahil umaalingasaw na ang mga krimen ni Halcon at hindi na rin kanyang pagtakpan ng kanyang mga upisyal, kapwa na niya militar ang pumatay sa kanya.

Samantala, bunga ng matinding demoralisasyon, di bababa sa limang sundalo ang basta na lamang lumayas (AWOL) sa AFP kamakailan sa Bikol. Tatlo rito ang mula sa "A" Coy ng 42nd IB na nakabase sa Garchitorena, Camarines Sur na nag-AWOL noong Agosto. Bago ito, isa pang sundalo mula sa "A" Coy ng 65th IB at isa ring elemento ng CAFGU mula sa 4th Sorsogon CAA Company ng 22nd Infantry Cadre Battalion ng Philippine Army ang lumayas noong Hulyo.

AB



Mapanupil na mga patakaran, sunud-sunod na ipinatutupad ni Arroyo

Nang patayin ni Gloria Arroyo at kanyang mga alipures sa kongreso ang prosesong *impeachment* noong nakaraang buwan, lalo nitong itinulak ang mamamayan at oposisyon na dalhin sa lansangan ang pagpapataksik sa kanya. Binabaluktot ni Arroyo ang reaksiyanyong batas sa pinakagarapal na paraan upang mapagsilbi sa makitid niyang interes at magamit sa paninikil sa lahat ng mga tumututol sa kanya.

Kabilang sa mga ligal na manobra ni Arroyo ang "*calibrated preemptive response*" (CPR), ang Executive Order 464 at ang minamadalang Anti-Terrorism Bill sa Kongreso. Layunin nitong pigilin at durugin ang sumusulong na kilusang magpapataksik sa rehimeng Arroyo.

Tahasang paglabag sa mga batayang karapatang sibil ng mamamayan ang naturang mga batas at panukala. Pawang taliwas ang mga ito maging sa konstitusyon ng reaksiyanyong gubyerno.

Subalit iginigiit pa rin ito ni Arroyo sa layuninng bigyang-katwiran ang paggamit ng dahas at panunupil laban sa mga tumututol sa kanyang paghahari at upang

makuha ang lahat ng gusto niya.

CPR. Buong kapalaluang idineklara ng Malakanyang ang patakaran ng "*calibrated preemptive response*" noon mismong Setyembre 21, ang ika-33 anibersaryo ng deklarasyon ng batas militar. Inianunsyo ni Executive Secretary Eduardo Ermita na ipagbabawal na ang mga raling walang permiso. Layunin nitong kontrolin at sistematikong supilin ang batayang karapatang sibil ng mamamayan para sa malayang pagtitipon at pamamahayag. Binigyang-awtoridad rin nito ang pulisya na manghuli di lamang ng mga aktibistang nagrarali kundi maging mga pinagsususpetsahan pa lamang na mamumuno o dadalo sa isang kilos protestang gustong

ituring ng rehimen na "iligal."

Sa ngalan ng CPR, walang pakundangan ang pandarahas ng mga pulis laban sa mga nagrarali. Noong Oktubre 4, marahas na dinispers ng mga alagad ng Western Police District ang mga nagrarali sa labas ng Malakanyang. Kabilang sa mga nasugatan ang mga taong-simbahan, mga myembro ng mga demokratikong organisasyon at maging ang mga kinatawan ng mga progresibong partido.

Sa halip na mapastras, muling naglunsad ng kilos protesta kinabukasan. Walang awat ang pandarahas ng mga pulis sa mga sumama sa raling binansagang "Walk for Democracy" (Alay-Lakad para sa Demokrasya) na pinamunuan pa ng mga grupong nagtatanggol ng karapatang-tao. Marahas ding binuwag ang rali na idinaos sa tulay ng Mendiola noong araw ding iyon. Maraming raliyista ang iligal na inaresto at mas marami pa ang nasaktan. Kahit sa harap ng midya, walang pakundangan ang kalabisan at brutalidad ng mga pulis, kabilang ang pag-atake sa isang matandang babae at sa mga raliyistang umatras at nakadapa na.

Nitong Oktubre 6, itinuloy ng mga myembro ng Bagong Alyansang Makabayan at Gloria Step Down (GSM) ang martsa patungong Mendiola sa kabila ng pagtanggig ng lokal na gubyerno ng Maynila na bigyan sila ng permit para magrali. Nagmamartsa pa lamang, tinangka na ng mga pulis na buwagin ang hanay ng mga nagpoprotesta. Binarikadahan ng mga pulis ang mga daan upang pigilan silang makalapit sa Mendiola.


Hindi maipagtatanggol kahit ng mga alipures ni Arroyo sa PNP ang karahasan at sumasahol na brutalidad sa pagbubuwag ng mga rali. Gayunpaman, matigas ang asata ng rehimeng gumamit ng dahas laban sa mga "iligal" na demonstrasyon. Pinuri mismo ni Secretary

Ermita ang mga aksyon ng pulis noong Oktubre 5 sa pulpol na pagdadahilang “inaalagaan lamang ng pulisya ang karapatan ng mayorya na kontra sa mapanggulong mga demonstrasyon.”

Labis-labis na ikinagagalit ng mamamayan ang araw-araw na pandarahas ng mga pulis sa lehitimo at mapayapang mga protesta. Sa harap ng walang awat na pandarahas ng mga pulis, hindi titigil ang kanilang pagsuway sa mga pasistang hakbangin ng rehimen at paggigiit sa kanilang mga lehitimong karapatan hanggang sa tuluyan nilang mapatalsik si Arroyo sa pwesto. Hindi malayong sa susunod na mga araw at linggo, lalo pang dadalas at lalaki ang mga aksyong protesta sa tarangkahan mismo ng Malakanyang.

Executive Order 464. Tanda ng desperasyon ng Malakanyang na pigilin ang pagsisiwalat ng dagdag na ebidensya hinggil sa pagkakasangkot ni Gloria Arroyo at ng kanyang asawang si Mike sa malawakang pandaraya sa eleksyong 2004, madaliang inilabas noong Setyembre 28 ang Executive Order (EO) 464 na tahasang nagbabawal sa pagtestigo sa Senado at Kongreso ng sinumang upisyal ng sangay ng ehekutibo. Kabilang sa mga pinagbawalan ang matataas na upisyal ng gabinete, mga upisyal ng Armed Forces of the Philippines at Philippine National Police at mga upisyal ng mga ahensya sa pambansang seguridad.

Sinikap ihabol ang EO 464 para pigilin ang pagtestigo nina Brig. Gen. Francisco Gudani at Lt. Col. Alexander Balutan sa imbestigasyong isinasagawa ng Senado kaugnay ng “Hello, Garci tapes”. Ngunit hindi nito napigilan ang pagbubunyag ng dalawang mataas na upisyal ng militar kaugnay sa kanilang nasaksihang pandaraya ng kampo ni Arroyo sa Mindanao noong nakaraang eleksyon. Isina-



Sa harap ng walang awat na pandarahas ng mga pulis, hindi titigil ang kanilang pagsuway sa mga pasistang hakbangin ng rehimen at paggigiit sa kanilang mga lehitimong karapatan hanggang sa tuluyan nilang mapatalsik si Arroyo sa pwesto.

sangkalan ngayon ng militar ang pagsuway ng dalawang upisyal sa EO 464 upang parusahan sila.

Bukod sa pagpigil sa pagtestigo ng dalawang upisyal ng AFP, mas masaklaw na layunin ng EO ang pagpigil sa pagtestigo sa Kongreso at Senado ng marami pang upisyal sa iba't ibang tanggapan ng guberno kaugnay ng iba pang kaso laban kay Arroyo at sa kanyang rehimen. Bilang pangangatwiran, isinangkalan ng Malakanyang sa paglalabas ng EO 464 ang pang-aapi umano ng Senado kay National Security Adviser Norberto Gonzales bunga ng pagtanggap niyang sagutin ang maraming susing katanungan ng mga senador tungkol sa pinirmahan niyang kontrata sa Venable LLP.

Kinabukasan, isinangkalan din ang EO 464 sa desperadong tangkang pigilan ang mga tetestigo tungkol sa maanomalyang kontratang pinasok ng rehimen kaugnay ng North Rail Project. Sa kabila nito, tumestigo sa imbestigasyon ang ilang propesor ng UP College of Law upang isiwalat ang mga natuklasan nilang mga anomalya sa proyekto.

Si Efren Gonzales, isang Assistant Government Corporate Counsel na may kalaman sa proyekto ay pinipigilan din ng namamahala sa upisina niya na sumipot sa pagdinig, pero tumuloy pa rin siya. Dahil dito, ikinandado ang upsina niya at pinagpapaliwanag siya kung bakit dumalo siya sa naturang pagdinig nang walang pahintulot ang presidente.

Binoykot din ng mga upisyal ng Dept. of Agriculture, Dept. of Agrarian Reform, Dept. of Trade at National Economic Development Authority ang pagdinig ng senado tungkol sa kontrobersyal na paggamit sa P2.8 bilyong pondong ipinamahala sa kagawaran para sana sa libreng pamamahagi ng abono sa mga magsasaka. Ngunit hindi napigilan ng Malakanyang ang pagtestigo ng mga kinatawan ng Commission on Audit kasabay ng pagtestigo rin ng mga kinatawan ng mga magsasaka.

Maging ang pagdinig ng Senado tungkol lamang sa napakaraming mga patalastas sa lansangan ay di sinipot ng apat na pangunahing upisyal ng gabinete ni Arroyo na may kalaman dito—sina MM-DA Chairman Bayani Fernando, DP-WH Sec. Hermogenes Ebdane, DILG Sec. Angelo Reyes at DOT Sec. Leandro Mendoza.

Subalit mariin ang pagtutol sa EO 464 ng ilang susing tauhan ni Arroyo, kabilang na ang kabibitiw lamang na Ombudsman na si Simeon Marcelo. Pinalabas na problemang pangkalusugan ang dahilan ng kanyang pagbibitiw. Hindi na rin masakmura ni Marcelo ang pamimilit ni Arroyo sa kanya na aregluhin na lang ang mga kasong nakasampa sa Ombudsman laban kay dating Justice Secretary Hernando Perez. Partikular dito ang pagtanggap ni Perez ng P2 milyong suhol mula sa Impsa (Industrias Metalurgicas Pescarmona Sociedad Anonima), ang kumpanyang Argentine na binigyan ng kontrata para sa reha-

bilitasyon ng Caliraya-Botocan-Kalayaan (CBK) *power plant complex* sa Laguna. Sangkot din sa kasong ito si Arroyo.

Anti-Terrorism Bill. Sa kabila ng kaliwa't kanang pagtuligsa sa mga anti-demokratiko at anti-mamayang hakbangin nito, muling itinulak ang madaling pagpapasa ng Kongreso sa nakabimbang Anti-Terrorism Bill (ATB). Sinamantala ni Arroyo ang sindak na dulot ng pambobomba sa Bali, Indonesia noong Oktubre 2 para ikatwiran ang pangangailangan umanong magkaroon ng ngipin at maging epektibo ang "gera laban sa terorismo" ni Arroyo.

Dali-dali itong inaprubahan ng Justice Committee at Foreign Affairs Committee ng Kongreso nitong Oktubre 4 nang may maraming dagdag na probisyong lantarang anti-demokratiko at anti-mamamayan. Ginawa nitong bagong krimen ang "inciting to terrorism" (pang-uupat ng terorismo). Saklaw nito ang "mga pananalumpati, mga pagpapahayag, sulatin, mga bandila at iba pang tulad nitong may pakay na mag-udyok sa iba tungo sa terorismo." Sa bagong bersyon ng ATB mula sa Kongreso, ang simpleng pagrarali ay posible nang ituring na "terorismo."

Dagdag pa, labis-labis na binailutot at lubhang pinasaklaw ng ATB ang kahulugan ng "terorismo"

para maisama pati banta sa mga indibidwal. Malayung-malayo na ito sa tunay na depinisyon ng terorismo, na sistematikong paggamit ng karahasan laban sa sibilyang populasyon para sa pagkakamit ng mga layuning pampulitika o pang-ideolohiya. Kaya ang ATB ay maring binabatikos ng mga eksperto sa batas na nagsasabing pilit nitong sinasaklaw maging ang mga krimen na dati nang saklaw ng batas, ngunit mapapatawan ng mas mabigat na parusa dahil sa pagkakakategoryang "terorista".

Kalakip din ng ipinasang bersyon ng komite ang mga probisyon kaugnay ng pagsapi sa mga organisasyong tinataguriang terorista, mas mahabang detensyon para sa mga suspetsado kahit walang nakasampang kaso, ekstradisyon at deportasyon ng mga pinaghihinalang terorista, at pagkriminalisa sa mga lehitimong aksyon at pagtutol ng mamamayan.

Ang mga probisyong ito ay isiningit lamang ng mga alipures ni Arroyo sa kasalukuyang kongreso at wala sa orihinal na panukala na inisponsor ni Rep. Roilo Golez noong nakaraang kongreso. Dahil dito, iniatras na ni Golez ang kanyang suporta sa naturang panukala.

Walang probisyon sa kasalukuyang panukala kaugnay ng terorismo ng estado at mga teroristang aksyon ng pulisya at militar na mga numero unong terorista sa bansa. Gagawin nitong ligal

ang panghahalughog at pagkumpiska nang walang mandamyento at iba pang pag-atake sa mga karapatang sibil ng mamamayan.

Pang-iipit ni Arroyo sa mga kalaban sa pulitika. Kaliwa't kanan din ngayon ang panggigipit ni Arroyo sa kanyang mga kalaban sa pulitika, gamit ang anumang sandatang maipupukol laban sa kanila. Sa Senado, mulat na nagpapagamit bilang instrumento ng panggigipit kina Sen. Franklin Drilon at dating Pres. Corazon Cojuangco Aquino si Sen. Miriam Defensor-Santiago. Pinaratangan sila ni Santiago ng pagpapalano ng kudeta at asasinasyon kay Arroyo kahit wala naman siyang maibigay na anumang ebidensya maliban sa impormasyong narinig lang niya.

Pinakahuli sa mapaniil na hakbang ni Arroyo ang pag-uutos niyang arestuhin at ikulong si Bro. Eddie Villanueva, pinuno ng Jesus is Lord Movement at isa sa pangu-nahing kritiko ni Arroyo, batay sa isang lipas na kaso ng *estafa*. Iniutos na rin ang pag-aresto kay Samuel Ong, ang dating upisyal ng National Bureau of Investigation na nagbunyag ng "Hello, Garci tapes". Kinasuhan si Ong ng pang-uupat ng sedisyon. Kinalkal din ang mga lumang kaso laban kina Dinky Soliman at Vicky Garchitorena, mga nagbitiw na myembro ng gabinete ni Arroyo.

Lubhang natatakot si Arroyo sa lumalawak na panawagan ng taumbayan na wakasan ang kanyang anti-mamamayan, anti-demokratiko, maka-imperyalista at pasistang rehimen. Kaya ginagawa niya at ng kanyang mga bayarang alipures ang lahat ng paraan, ligal at iligal, hayagan at lihim, upang mapahigpit ang kapit nila sa poder. Subalit lahat ng mga hakbanging ito ay lalo lamang ikinagagalit ng taumbayan at nag-uudyok sa mas maraming mamamayan na kumilos at lumaban.



Ligalig na mga sundalo

Panibagong bigwas sa gumegewang na rehimen ang pagtestigo ng dalawang matataas na upisyal ng AFP kaugnay ng lansakang pandarayang ginawa ni Gloria Arroyo at kanyang asawang si Mike noong nakaraang eleksyon.

Kinumpirma ni Brig. Gen. Francisco Gudani ang papel ni Comelec Commissioner Virgilio Garcillano sa ginawang pandaraya ng kampo ni Arroyo sa Lanao del Sur. Kinumpirma rin niyang tinanggal siya bilang kumander ng 1st Marine Brigade at Task Force Ranao, pinagbakasyon at pinaglaro na lamang ng *golf* dulot ng kanyang pagtanggì na maging bahagi ng pandaraya nina Arroyo at Garcillano sa eleksyon sa saklaw ng kumand niya at gamitin para rito ang mga pwersang militar sa ilalim ng kanyang pamumuno. Ibinahagi ni Gudani na personal na nagdala at namudmod si Mike Arroyo ng hanggang P500 milyon sa Mindanao para tiyakin ang pananaloo roon ng kanyang asawa. Nasaksihan niya ang mga isinagawang pandaraya “mula sa simula hanggang sa katapusan” at ang pagkakasangkot dito ng maraming upisyal ng militar.

Ayon naman kay Lt. Col. Alexander Balutan, pinuno ng 7th Marine Battalion sa ilalim ng Marine Brigade ni General Gudani noong panahon ng eleksyon, inutusan siya at si Gudani ni Lt. Gen. Roy Kyamko, kumander noon ng Southern Command, na suportahan ang mga pandaraya sa eleksyon sa Mindanao. Inatasan sila ni Kyamko na “sundin ang *chain of command*” at “luwagan ang seguridad sa halalan.” Pero matatag na tumanggi kapwa sina Gudani at Balutan na makisangkot sa dayaan.

Noon mismong araw ng pagtestigo ng dalawang upisyal militar sa Senado, inilabas ni Arroyo ang mapaniil na Executive Order 464 para pigilan silang ibunyag ang kanilang mga nalalaman. Idineklara

mismo ni Gen. Generoso Senga, hepe ng AFP, na iligal ang kanilang ginawa dahil sumuway sila sa *chain of command* at na marapat kasuhan at litisin ang dalawang upisyal sa korte militar. Agad silang tinanggal sa kanilang mga pwesto sa Philippine Military Academy. Pinigil na rin ang nakatakdang seremonya sa PMA para sa pagpupugay kay Gudani sa araw ng pagreretiro niya sa AFP noong Oktubre 4 at ipinagkait sa kanya ang lahat ng benepisyong matatanggap sana niya sa kanyang pagreretiro.

Batid ng dalawa ang mga desperadong tangka ng rehimen na busalan sila at iba pang mga sundalo at upisyal na nais nang kumawala sa bulok na rehimeng Arroyo. Di sila nagpapigil at lalo lamang tumibay ang kanilang determinasyon laban sa rehimen sa kabila ng mga paghihiganti ng Malakanyang.

Umani ng malawakan at matitinding batikos ang paniniil at pananakot ng rehimen mula sa iba’t ibang sektor ng lipunan, kabilang na ang iba’t ibang grupo ng mga retiradong heneral at matataas na upisyal ng AFP, mga rebeldeng organisasyon ng mga nakababatang upisyal at karaniwang sundalo. Ani Sen. Rodolfo Biazon, aabot sa 10

pang upisyal ng AFP ang nakahandang tumestigo sa Senado upang kumpirmahin ang mga ibinunyag nina Gudani at Balutan.

Paparaming mga grupo at indibidwal sa loob ng AFP ang naghihintay na lamang ng tamang panahon para lantarang mag-atras ng suporta at kumilos para pabagsakin si Arroyo. Aabot sa 46 na retiradong heneral ang lantarang nagpahayag ng suporta sa mga pagbunyag nina Gudani at Balutan. Mas marami pang nakababatang upisyal ang nagpahayag ng kahanandang sumuway sa *chain of command*. Ayon sa kanila, aabot sa 70% ng mga sundalo sa AFP ang handang kumilos para patalsikin ang rehimen.

Binati ng rebolusyonaryong kilusan ang ginawang pagtindig ng dalawang upisyal. Sa isang pahayag, sinabi ni Gregorio “Ka Roger” Rosal, tagapagsalita ng Partido Komunista ng Pilipinas, na handa ang rebolusyonaryong kilusan na makipag-alyansa at makipagtulungan sa lahat ng mga elemento ng AFP na nagnanais ng tunay o rebolusyonaryong pagbabago sa lipunan. Si numang sundalo o upisyal na sinisikil ng rehimen ay maaaring pumasok at kumanlong saan mang larangang gerilya.

AB



Gen. Francisco Gudani

Kontrol ng US sa pagbabago sa konstitusyon

Wala ni katiting na pag-aatubili si Arroyo na ibenta ang soberanya ng Pilipinas kapalit ng pagpapatuloy ng kanyang kapangyarihan. Naninikluhod siya sa US upang hilingin ang pakikialam nito sa mga internal na usapin ng Pilipinas, kabilang ang pagbabago sa saligang batas ng reaksyunaryong gubyrno para higit itong umayon sa kagustuhan ng US.

Ang desperadong hakbang na ito ng rehimen ay pinakahuli lamang sa humahabang listahan ng matitinding dahilan upang si Gloria Arroyo ay patalsikin sa poder at usigin sa mga kasalanan niya sa bayan.

Nito na lamang kalagitnaan ng Setyembre nabunyag ang tungkol sa lihim na pagpasok ni Arroyo noon pang Hulyo 25 sa isang kontrata sa Venable LLP, isa sa nangungunang kumpanya sa pagla-lobby (pagkumbinsi sa mga upisyal ng gubyrno na suportahan ang mga partikular na patakaran o hakbang) sa US. Naki-

pagkontrata si National Security Adviser Norberto Gonzales sa Venable upang lakarin nito sa kongreso at iba pang susing tanggapan ng US ang paghingi ng rehimen ng Arroyo ng basbas ng US at pondo para sa pag-amyenda sa konstitusyon ng Pilipinas. Umaabot sa \$75,000 (P4.2 milyon) bawat buwan, o P50.4 milyon sa isang taon ang bayad sa serbisyo ng Venable. Hindi pa kabilang dito ang karagdagang mga gastos sa paglalakbay, telepono, fax, copying, at iba pa at ang sinasabing bayad sa serbisyong propesyunal ng matataas na upisyal ng kumpanya na umaabot sa \$720 (P40,320) bawat oras. Kung ibibilang itong mga karagdagan pang bayarin, dodoble pa ang P50.4 milyong gastos.

Desperadong hakbang ni Arroyo ang pagbabago ng konstitusyon para maibaling dito ang atensyon ng publiko, madiskaril ang mga pagkilos ng mamamayan para mapatalsik siya at makapanatili pa siya sa poder sa harap ng tumitinding disgusto


sa kanya ng mamamayan. Umaasa siyang mababago ang porma ng gubyrno tungo umano sa sistemang parlamentaryo at pederal para magamit niya ito upang makapanatili pa sa pwesto.

Kapalit ng pondong limos at suporta ng US para sa kanyang rehimen, ipinaubaya ni Arroyo sa imperyalistang US ang mga pagbabago sa konstitusyon ng gubyrnong Pilipinas. Binibigyang-laya ng rehimen ang US na wasakin ang lahat ng nalalabing mga probisyong nagtatanggol sa soberanya ng bansa at kapalit nito, ang matanggal ang lahat ng mga sagka sa kanilang pag-aari ng lupa at pandarambong ng mga dayuhang imperyalista sa mga industriya at likas na yaman ng Pilipinas.

Gayundin, ipinalalakad niya sa Venable ang dagdag na mga pautang at ayuda mula sa US na gagamitin para umano tumaas ang kakayahan ng militar at pulisya ng Pilipinas. Sa partikular, kailangang-kailangan ngayon ni Arroyo ang dagdag na ayudang militar mula sa US para labanan ang rebolusyonaryong kilusan, supilin ang mga paglaban ng mamamayan at mapahigpit pa ang hawak niya sa militar at pulisya, lalupa't pera na lamang ang nagbibigkis sa kanya sa pinakakurakot at pinakamasahol na mga upisyal ng AFP at PNP.

Panghihimasok.

Ang kontrata sa Venable ay pinakahuli lamang sa mga pagtataksil sa bayan ni Arroyo kasabwat ang mga dayuhang kumpanya at ahensya. Kauupo pa lamang ni Arroyo noong 2001, nakikipagtulungan na



Katulad ng Venable, ang mga kumpanyang ito ay nagagamit sa pakikialam ng US sa mga usaping pang-ekonomya at pampulitika ng Pilipinas.



siya sa Agile Philippines na aktibong nakikialam sa pagbubuo ng mga batas para sa halos lahat ng mahahalagang usaping may kaugnayan sa ekonomya at pinansya sa bayan. Pinopondohan ng USAID ang Agile Philippines.

Pinakamabigat na pagtataksil ni Arroyo sa bayan ang pagpayag na gawing base militar na ng US ang buong bansa Pilipinas sa pamamagitan ng pagpapapasok ng mga tropang pangkombat ng US sa iba't ibang lugar sa bansa at pagbubukas sa himpapawid, daungan at kalupaan ng bansa para malayang magamit sa mga operasyong militar ng US. Hindi na kailangan pa ang pormal na tratado, permanenteng istruktura at mga takdang lugar.

Isa lamang ang Venable LLP sa mga dayuhang kumpanyang lihim na kinontrata ni Arroyo para sa iba't ibang pakana niya upang makapanatili sa poder. Mula nang maluklok siya sa poder, gumastos na si Arroyo ng di bababa sa \$3.7 milyon o P208 milyon na pambayad sa mga kontrata niya sa walong magkakaibang dayuhang kumpanya at mga espesyalista.

Apat sa mga kontratang ito ang umiiral hanggang sa kasalukuyan at patuloy na binabayaran. Ang iba pang kontratang pinasok ni Arroyo ay nakatuon sa pagpapatatag ng ugnayan ng Pilipinas at US, pagimbata ng mga dayuhang negosyante sa pamamagitan ng paglalarawan para sa kanila ng ilusyong matatag ang pulitika at ekonomya sa bansa, at iba pang serbisyong

direktang may pakinabang kay Arroyo, sa kanyang mga alipures at mga kaalyadong lokal na negosyante. Katulad ng Venable, ang mga kumpanyang ito ay nagagamit sa pakikialam ng US sa mga usaping pang-ekonomya at pampulitika ng Pilipinas.

Handang magwaldas ng pera si Arroyo para sa sariling kapakinabangan. Habang patuloy na lumulubog ang bansa sa matinding krisis pang-ekonomya, habang sinasagkaan ng rehimen ni Arroyo ang makatarungang pagtaas ng sahod ng mga manggagawa at sahod ng mga kawani, habang walang tigil na papalaki ang depisit sa badyet ng gubyrno at habang panay ang pananawagan ng rehimen sa mamamayan na magtipid, walang kahihiyang nagtatapon naman ang rehimen ng malaking pera at pumipirma sa multimilyong pisong mga kontrata sa mga dayuhang kumpanya para magpabango ng imahe at makakuha ng mga pabor sa US.

Pilipit na dila. Pumaloob sa kontrata sa Venable si Arroyo sa pamamagitan ng tapat nitong amuyong at ahenteng paniktik ng US na si National Security Adviser Norberto Gonzales. Kung di man inilihim nina Arroyo at Gonzales ang kontrata maging sa iba pang myembro ng gabinete ni Arroyo, maging sa mga myembro ng National Security Council na kinabibilangan ni Gonzales, sa abugado ng pangulo, sa Dept. of Foreign Affairs at sa embahada ng Pilipinas sa US, nagmamaang-maangan ang iba pang may alam sa kontrata.

Para iwasan ang direktang pagkakasangkot ni Arroyo, kunwa'y inako ni Gonzales ang lahat ng pananagutan sa pagpasok sa maanomalyang kontrata. Pero nagkabuhul-buhol ang dila ni Gonzales sa kaiiwas na sagutin nang diretso ang mga tanong sa imbestigasyon sa Senado noong Setyembre 21.

Matigas na tumanggi si Gonzales na sagutin ang mga susing katanungan tungkol sa pondo para sa kontrata, kabilang ang pinanggalingan ng pondong ipinambayad rito. Mga pribadong indibidwal di umano ang pinanggalingan ng pondo, subalit tumanggi siyang pangalanan kung sinu-sino ang mga ito na ayon sa kanya'y si Pres. Arroyo lamang ang nakakaalam.

Dulot ng matinding galit sa halatang pagmamaang-maangan at pagsisinungaling ni Gonzales, kinastigo at idinetine siya ng mga senador dahil sa kawalang-respeto niya sa Senado dahil sa pangtangging sumagot nang maayos sa mga tanong sa kanya. Nagdrama siya na inatake siya ng altapresyon at kinutsaba pa ng Malakanyang ang kanyang doktor para palabasing kailangang kaagad siyang operahan sa puso, pero kailangang palayain muna ng Senado. Ginamit ng Malakanyang ang drama ni Gonzales para palitawing inapi at kinawawa siya ng mga senador.

Dahil sa pagkakabunyag, napilitang kanselahin ng Malakanyang ang kontrata sa Venable. Subalit kailangan ding bayaran ang lahat ng nagastos ng Venable. Hindi na rin mababawi ang paunang tatlong buwang bayad.

Samantala, ang drama ni Gonzales ay isinangkalan ni Arroyo para makapaglabas ng isang Executive Order 464 na nagbabawal na sa pagtestigo sa Kongreso ng sinumang upisyal ng ehekutibong sangay ng gubyrno, militar at pulisya, nang walang pahintulot ng presidente.

Arroyo, nagkukunwaring maka-magsasaka

Gagamitin at gagawin ni Gloria Arroyo ang lahat para makapanatili sa pwesto. Sa layuning gipitin si Corazon Cojuangco-Aquino, na mula noong Hulyo ay nakiisa sa malawak na panawagan para sa pagbibitiw ni Arroyo, inilabas ng Department of Agrarian Reform (DAR) ang rekomendasyong pawalambisa ang kontrata sa pagitan ng mga magsasaka sa Hacienda Luisita at ng pamilyang Cojuangco sa ilalim ng iskemang *stock distribution option* (SDO) bunga ng matitingkad na paglabag ng pamilyang Cojuangco sa mga probisyon nito.

Hindi maipagkaila ng DAR ang pagkamakatarungan ng pakikibaka ng mga magsasaka at manggagawang bukid sa HLI kaya naobliga itong ilabas ang rekomendasyon. Ibinubukas nito ang ligal na batayan para lalong isulong ang matagal nang pakikibaka para sa ganap na pagbabasura ng SDO at pagsasailalim ng HLI sa tunay na reporma sa lupa.

Subalit duda mismo ang mga magsasaka at manggagawang bukid sa HLI kung mayroon itong makabuluhang ibubunga para sa kanilang matagal nang pakikibaka para sa tunay na reporma sa lupa. Lubos nilang nauunawaan na kailangan

pa nilang puspusang makibaka at magsakripisyo upang makamit ang ganap na pagsasakatuparan ng tunay na reporm sa lupa sa asyenda.

Alam na alam nilang sa nakaraan ay kasabwat ng mga Cojuangco si Arroyo sa pagpapatibay ng SDO sa HLI. Duguan din ang kamay ni Arroyo sa pagmasaker sa mga magsasaka at manggagawang bukid sa piketlayn sa asyenda noong Nobyembre 2004 at sa walanghabas na pananakot at karahasan laban sa kanila at kanilang mga tagasupporta.

Kaya alam nilang ginagamit lamang ni Arroyo ang kanilang makatarungang pakikibaka upang gipitin si Corazon

Aquino at hatiin ang malawak na nagkakaisang prenteng anti-Arroyo. Ang pinal na desisyon sa kaso ng HLI ay nasa kamay ng Presidential Agrarian Reform Council (PARC) na tuwirang pinamumunuan ni Arroyo. Inasahan na ang magiging desisyon ng PARC ay itatakda, hindi ng pag-

kamakatarungan ng pakikibaka ng mga magsasaka at manggagawang bukid, kundi ng pampulitikang negosasyon at labanan sa pagitan ni Arroyo at ni Aquino at mga Cojuangco. Wala ni katiting na interes si Gloria Arroyo na resolbahin ang usapin sa Hacienda Luisita pabor sa mga magsasaka.

Taliwas sa matagal nang sigaw ng mga magsasaka na ibasura ang iskemang SDO, ang rekomendasyon ng DAR ay nagpapatibay pa rito. Tinarget lamang nito ang HLI at ang mga "paglabag nito sa kontrata." Maingat na maingat si Arroyo na kwestyunin ang mismong SDO dahil malalawak na lupain ng malalaking panginoong maylupa ang nakalusot sa Comprehensive Agrarian Reform Program (CARP) at napanatili sa kanilang kamay sa pamamagitan ng iskemang ito.

Kabilang dito ang mahigit 300 ektarya ng pamilya ni Mike Arroyo sa Negros at ang daan-daan libong ektaryang lupain ni Eduardo "Danding" Cojuangco sa Negros at Isabela na pawang nakapailalim sa ala-SDO na "*corporative scheme*." Patuloy na hinihimok at binibigyang-pabor ni Arroyo si Danding para patuloy niyang matamasa ang suporta nito sa pulitika at di ito matulad sa pinsan niyong si Corazon Aquino na bumaling sa oposisyon.

Hindi rin ito ang unang pagkakataong ginamit ni Arroyo ang masang magsasaka para sa sariling kapakinabangan. Nabunyag kamakailan ang anomalya hinggil sa ₱2.8 bilyong pondo ng Ginintuang Masagang Ani na nakalaan sa subsidyong abono para sa mga magsasaka. Sa halip na ibili ng abono, napunta ang pondo sa mga huwad na *non-government organization* na hawak ni National Security Adviser Norberto Gonzales at iba pang alipures ng Malakanyang, at ginamit sa pangangampanya ni Arroyo noong 2004.

AB



Pasistang dahas, sinimulan na ni Palparan sa Central Luzon

Di nag-aksaya ng panahon ang berdugong si Brig. Gen. Jovito Palparan bago siya naghasik ng pasistang dahas sa bago niyang destino sa Central Luzon.

Mula noong Setyembre 1, kaa-gad pagkatalaga sa kanya bilang hepe ng 7th ID na nakabase sa Fort Magsaysay, Nueva Ecija, pito nang lider-masa at aktibista sa Central Luzon ang pinaslang. Unang naging biktima ng pananalbeyds ang isang lider ng Pinag-isang Samahan ng Tsuper at Opereytor Nationwide na pinatay sa Norzagaray, Bulacan matapos ang malawakang tigil-pasada sa rehiyon noong Setyembre 12. Pinaslang din noong Setyembre si Jose Levimar Rieza, isang residente ng Orani, Bataan, at dalawang aktibistang Aeta sa bayan ng Abucay sa parehong prubinsya.

Pinakahuling mga biktima ang dalawang myembro ng Anakpawis sa Nueva Ecija at isang *coordinator* ng Bayan Muna (BM) sa Tarlac. Pinatay nitong Oktubre 7 sa Victoria, Tarlac si Rolando Mariano, BM *coordinator* sa naturang bayan. Pinaslang si Armando Javier Jr. sa kanyang bahay sa Barangay Sta. Clara, Cuyapo, noong gabi ng Oktubre 2. Halos dalawang oras bago ito, dinukot si Cecilia Esteban sa kanyang bahay sa Barangay Lennec, Guimba. Natagpuan siyang wala nang buhay sa bayan din ng Guimba nitong Oktubre 5.

Nasangkot si Palparan sa 199 kaso ng pamamaslang, bigong pagpatay, tortyur, pambubugbog at arbitraryong pang-aaresto at detensyon ng mga sibilyan at tagapagtugyod ng karapatang-tao nang ita-laga siya bilang hepe ng 8th ID sa Eastern Visayas. Nadestino siya ri-

to mula Pebrero hanggang Agosto 2005. Inilipat siya sa Central Luzon nang igiit ng mamamayan ng Eastern Visayas na patalsikin na siya sa rehiyon.

Bago ito ay nakapag-



tala ang organisasyong Karapatan ng 326 na kaso ng paglabag sa karapatang-tao sa Oriental Mindoro noong panahong hepe ng 204th Infantry Brigade si Palparan doon mula 2001 hanggang 2004.

Dahil sa kanyang madugong rekord ng panunupil sa mga militante at progresibong pwersa at mga pinaghihinalaang tagasuporta ng rebolusyonaryong kilusan, tuluy-tuloy na ginagantimpalaan ni Gloria Arroyo ng mga promosyon at medalya si Palparan. AB

Libu-libo, nakipaglibing sa pinaslang na lider-manggagawa

Umabot sa 2,000 manggagawa, mga kaibigan at tagasuporta mula sa Cavite, Quezon, Batangas, Rizal at Metro Manila ang dumagsa sa Calamba, Laguna noong Setyembre 29 upang ihatid sa libingan ang mga labi ng pinaslang na lider-obrerong si Diosdado "Ka Fort" Fortuna, 50.

Sinabayan ng mga kilos protesta ng mga manggagawa at kapangalig sa National Capital Region (NCR), Central Luzon, Bikol, Cebu, Davao at iba pang bahagi ng Mindanao ang libing. Bago ito, ibinurol ang mga labi ni Ka Fort sa University of the Philippines sa Quezon City. Plano sanang imartsa ang bangkay patungong Mendiola para maigiit sa anti-manggagawang rehimeng Arroyo ang katarungan para sa pagkakapaslang sa beteranong unyonista. Hinarang ng mga pulis ang martsa bago ito makarating sa Mendiola.

Pinagbabaril hanggang sa mapatay si Ka Fort malapit sa kanyang bahay sa Barangay Paciano Rizal, Calamba noong hapon ng Setyembre 22 ng mga armadong lalaking pinaniniwalaang militar. Kagagaling lamang niya sa piketlayn ng mga manggagawa ng Nestlé-Filipro sa Cabuyao, Laguna, na nasa ikatlong taon na ng kanilang welga. Si Ka Fort ang ikalawang pangulo ng Union of Filipro Employees-Drug and Food Alliance (UFE-DFA) na pinatay. Humalili siya kay Mel Roxas na pinatay noong 1989.

Mariing binatikos ng mga manggagawa ang pagpatay kay Ka Fort. Kinundena rin nila ang pananahimik ng administrasyong Arroyo, at sa partikular ni Sec. Patricia Sto. Tomas sa kasong ito.

Samantala, isang liham-petisyong kumukundena sa pagpaslang kay Ka Fort ang pinirmahan ng mga aktibistang dumalo sa malaking raling anti-gera sa Washington D.C. noong Setyembre 24. Mainit na sinuportahan ng mga demonstrador ang petisyon. Isa sa mga pumirma si Jessica Lange, isang premyadong artista sa US. AB



Limang lider-magsasaka, inaresto sa Negros Occidental

Mariing kinundena ng Kilusang Magbubukid ng Pilipinas (KMP) ang pagkakaaresto ng limang upisyal at dalawang miyembro ng samahan sa isang tsekpoynat ng 12th IB sa Barangay Camingawan, Kabankalan City, Negros Occidental noong Setyembre 30. Inaresto sina Morito Dionson, konsultant ng KMP; Marilou at Abraham Villanueva, mga organisador ng KMP; Charity Villar, organisador ng KMP-Amihan; Danny Dayanan, organisador ng Teatro Obrero; at ang kanilang mga kasamang sina Jermie Gellegan at Rico Abrasaldo.

Arbitrario silang isinangkot sa pananalakay ng BHB noong Setyembre 27 sa detatsment ng militar sa Barangay Haba, Candoni, sa parehong prubinsya. Ayon sa mga ulat, tinutukan sila ng mga baril, pinirangan at pinadapa. Ihiniwalay

din sa grupo si Dionson at isinakay sa isang *van* na tumungo sa di lamang destinasyon.

Sa bisa ng petisyong *habeas corpus* na isinampa sa Kabankalan Regional Trial Court (RTC), pinalaya ng militar ang lima noong Oktubre

5. Ngunit ilang oras pagkatapos nito, sila ay ikinulong sa Provincial Jail sa Bacolod City dahil sa anim na iba't ibang kasong kriminal na isinampa sa Ilog-Candoni Municipal Trial Court at Kabankalan RTC.

Ayon sa KMP at sa Karapatan-Negros, nanggaling ang mga biktima sa isang pulong ng KMP sa Dumaguete City at pabalik na sila sa Bacolod nang sila ay harangin sa tsekpoynat at damputin. Nagsampa na ng kaso ang KMP sa korte para igiit sa militar ang pagpapalaya sa mga inaresto. AB

JASIG, muling sinuspinde ng GRP

MARIING binatikos ng National Democratic Front of the Philippines (NDFP) ang kara-karakang pagsuspindi ng rehimeng Arroyo sa Joint Agreement on Safety and Immunity Guarantees (JASIG) na nagbibigay-proteksyon sa lahat ng miyembro, konsultant at istap ng *negotiating panel* laban sa pag-aresto. Ayon kay Luis Jalandoni, pinuno ng *negotiating panel* ng NDFP, ang suspensyon ay labag sa itinakdang proseso. Kung nais ng rehimen na baklasin na ang JASIG, na katumbas ng pagbabasura na sa usapang pangkapayapaan mismo, kailangan nitong maghintay ng 30 araw, aniya. Ang pananakot nitong kagyat na aarestuhin ang sinumang kasapi, konsultant o istap ng NDFP *panel* ay nagpapakita lamang ng kataksilan at kawalang-respeto ng rehimen sa mga kasunduan at sa usapang pangkapayapaan.

Patuloy na binabaluktot ng rehimeng Arroyo ang naging resulta ng impormal na pag-uusap noong nakaraang buwan upang bigyang-katwiran ang hungkag na suspensyon ng JASIG. Ayon sa GRP, ang suspensyon ng JASIG ay tugon sa patuloy umanong pagtanggig ng NDFP na muling makipag-usap.

Muling inilinaw ni Jalandoni na hindi kailanman tumalikod ang NDFP sa usapang pangkapayapaan. Ipinagpaliban lamang nito ang pormal na pakikipag-usap noong nakaraang buwan upang bigyan ng panahon ang GRP na tumupad sa mga nauna nang kasunduan. Nananatiling bukas at handa ang NDFP na muling buksan ang pormal na usapang pangkapayapaan.

Gen. Jarque at asawa, binastos, ikinulong at idineport ng US

BINASTOS at tinratong parang hayop ng US Immigration, Homeland Security Unit at lokal na pulis sina (ret.) Gen. Raymundo Jarque ang kanyang asawa noong Setyembre 22.

Binibisita ng mag-asawang Jarque ang kanilang anak at mga kamag-anak sa US kasabay ng pagpapagamot ni Gng. Xenia Jarque. Subalit kabababa pa lamang nila sa eroplano sa Dallas, Texas, idinetini na sila ng US Immigration. Sa loob ng 24 oras, ipinailalim sila sa mahahabang interogasyon bago ikinulong. Pinaghiwalay sila, pinaghubad at pinagsuot ng damit ng preso. Hindi sila pinayagang maligo at hindi rin pinayagang uminom ng gamot si Gng. Jarque. Isang buong araw silang di pinayagang makausap ng kanilang mga kamag-anak o abugado. Nakausap na lamang nila ang kanilang mga kamag-anak bago sila ideport ng US.

Mariing kinundena ng NDFP ang ginawang pambabastos ng US sa mag-asawang Jarque. Ayon kay Ka Luis Jalandoni, tagapangulo ng NDFP *peace panel*, arbitraryong binansagan ng US na terorista si General Jarque, at dahil dito'y tinrato siya at ang kanyang asawa na parang hayop. Aniyan, ito'y kahit "ni isa sa kanila ay hindi kailanman naakusahang gumawa ng anumang krimen laban sa US o sinumang mamamayan nito sa US o saanmang bahagi ng mundo."

Kinundena rin ng NDFP ang rehimeng Arroyo sa pakikipagsabwatan nito sa US at sa pagpapahintulot sa US na manghimasok sa Pilipinas.

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Taon XXXVI Blg. 19
Oktubre 7, 2005
www.philippinerevolution.org

Editoryal

Biguin ang umiigting na pasismo ng rehimeng Arroyo

Papatinding panunupil at pasistang karahasan ang isinasagawa ng rehimeng Arroyo sa imbing layuning pigilin at patahimikin ang lumalawak na panawagan ng sambayanang Pilipino para wakasan ang kinamumuhang rehimen. Walang kaabug-abog nitong ipinagbabawal ang mga demonstrasyon sa lansangan sa ngalan ng *"calibrated preemptive response"*. Tulad ng isang diktador, binubusalan ni Arroyo ang kanyang mga upisyal sa pamamagitan ng Executive Order 464. Nagkukumahog itong kumpletuhin ang ha-

yagang pasistang paghahari kaya minamadali ngayon ang pagpapasa ng Anti-Terrorism Bill na naglalaman ng mga probisyong katumbas ng batas militar.

Muling binubuhay ni Arroyo ang pasistang hali-maw na namayagpag sa panahon ng diktadurang Marcos sa layong duruin at takutin ang mamamayan. Ni-yuyurakan niya ang mga karapatang-tao, mga kalayaang sibil at mga demokratikong proseso. Ipinangangalandakan niya ang pagpapairal ng batas para lamang lapastanganin ito. Ginagawa niyang lahat ito sa pag-aakalang kaya niyang patahimikin ang mamamayan at pigilan ang kanilang pag-aalsa.

Kumikilos si Arroyo na parang isang diktador. Tulad ni Marcos, ipinailalim ni Arroyo sa kanyang kapangyarihan ang mayorya ng mga kongresista sa pamamagitan ng pagbili ng kanilang katapatan. Nagamit na niyang kasangkapan ang mga ito para patayin ang proseso ng *impeachment* at pigilin ang imbestigasyon sa pandaraya sa nagdaang eleksyon. Ginagamit niya sila ngayon upang madaliin ang pagpapatibay ng Anti-Terrorism Bill. Isa na lamang *"rubber stamp"* ang kongreso na tagaaprubang



Mga tampok sa isyung ito...

Isang M60, nasamsam ng BHB sa Isabela
PAHINA 4

Mapanupil na mga patakaran ni Arroyo
PAHINA 6

Pasistang karahasan ni Palparan sa Central Luzon
PAHINA 6

Mga instruksyon sa paglilimbag

1. Ang **sinundang pahina**, na eksaktong kopya ng pahina 1 maliban sa mas mapusyaw ang *masthead* o *logo* ay para sa mga gumagamit ng *mimeo machine* o naglilimbag sa paraang *v-type*. Idinisenyo ito para hindi madaling makasira ng istensil.

2. Pag-*print* sa istensil:

- a) Sa *print dialog*, i-check ang **Print as image**
- b) Alisin ang *check* sa **Shrink oversized pages to paper size**
- k) I-click ang **Properties**
- d) I-click ang **Advanced**
- e) Tiyaking naka-set sa **100%** ang **Scaling**
- d) Ituloy ang pag-*print*

3. Hinihikayat ang mga kasama na ipaabot sa panugutan ng *AB* ang anumang problema kaugnay ng paglilimbag sa pamamagitan ng *v-type*. Magpadala ng *email* sa angbayan@yahoo.com